

Friday, April 10, 2026

Time - 2:30pm - 2:35pm

**AKASHVANI AIZAWL
REGIONAL NEWS UNIT**

**REGIONAL NEWS BULLETIN
(MIDDAY)**



WORLD HOMEOPATHY DAY

World Homeopathy Day chu khawvel hmun dang rualin vawiin khan Aizawl ah pawh Chanmari YMA Hall ah hman a ni a, Homeopathy in kawng tinrenga hma a sawn theih nan a Research pawimawhna te zirho a ni.

Kumin-a World Homeopathy Day-ah hian thupui atan ‘Homoeopathy for Sustainable Health’ tih chu hman niin Ayush Medical Officer Dr Ruthi Laldingpuii M.O chuan Homeopathy lo pian chhuah dan leh mihring hriselna atana a pawimawh leh tangkai dan te, Mizoram-a an dinhmun tlangpui leh World Homeopathy Day lo chhuah dan leh Homoeopathy chungchang a hriattur pawimawh hrang hrang te an sawi a.

Mizo zingah Homoeopathic Doctor, Bachelor of Homeopathic Medicine and Surgery (BHMS) zirchhuak mi 256 leh Post-Graduate zir zo tawh mi 10 leh Ayurvedic 1 awm mekin, Mizoram sawrkar hnuaiah mi 19 thawk mek an awm baw. Homeopathy Doctor te hi Mizoram chhunga District Hospital zawng zawng leh CHC leh PHC thenkhatah te rawn theiha an awm bakah Health & Wellness Centre, AYUSH in a enkawl bik Centre 41-ah te inentir theih reng a ni a, a mamawh te hnenah a thlawnin damdawi chi hrang hrang pawh semchhuah thin a ni baw.



PWD SUB DIVISION

Public Works Department (PWD) Biate Sub Division chu nimin khan PWD Minister Pu Vanlalhlana n a hawng.

Chief Engineer (Roads) Pu David Sapzova sawi danin, Biate sub-division-in a enkawl tur kawngte chu Chalrang atanga Biate panna te, Khawhai atanga Tlangpui panna te, Tlangpui atanga Lungva panna te, Chalrang atanga Vantlang panna te, Khawhai atanga Lungtan panna te, Chalrang atanga Rianglei kawng te, Biate atanga East Lungdar panna te, Biate atanga Tuipui panna te, Biate atanga Bungzung panna kawngte an ni.

PWD sub-division hawna inkhawmah hi PWD Engineer-in-Chief Pu H. Zoramliana'n a kaihruai a, Hrangturzo bialtu MLA Pu Lalmuanpuia Punte leh Lunglei West bialtu MLA Pu T. Lalhlimpaia te an tel a ni.



LADC

Lai Autonomous District Council a Chairman Pu C.Lalmuanthanga chuan Governor chu Lok Bhavan ah hmuin, District Council mamawh hrang hrang te a sawipui.

Pu C.Lalmuanthanga chuan LADC Session ah danin thuneihna a pek hnuaiah dan hrang hrang pulutin pawm a ni thin a, heng zingah hian thuneitu sang zawk a thlen hnuaiah hmantheih a peihfel ni mailo thin chuan LADC rorelna pawh a zahawm tur angin a zahawm thinlo ni a sawiin, dan an pawm tawhte hman theihloha a awm thin chu ram mipui ten an tawrh pha thi a ti.

Tuntuma Chairman Pu C.Lalmuanthanga'n dan an lo pawm tawh hmantheiha la awmlo, hma laksak tura Governor hnen ah zing ah - The LADC Engineering Service Rules, 2022.

The LADC Sport & Youth Services Department (Group A, B & C Technical Recruitment Rules, 2022.

The Lai Autonomous District Council, Education & Human Resources (Group B & D) Recruitment (First Amendment) Rules, 2022 (Re-submitted)

The Lai Autonomous District Council (Marriage and Divorce) (First Amendment) Bill, 2026.
te chu a langsar zual a ni.

Governor chuan LADC Chairman in a hnena a thlente chu theihtawp chhuaha lo bawhzui a tum thu Pu C.Lalmuanthanga hi a lo hrilh.



SAITUAL TUNG GROWER ASSN

Saitual District Tung Grower Association chuan vawiin khan Assembly vawi khatna Saitual ah an hmang.

Hun hmanpuitu Saitual District Agriculture Officer Pi Hmangaihthangi chuan District Tung Assciation chu pawl dang, tlawmngai pawl ang ni lovin an eizawna atana pawl din, sumdawng pawl an nih angin lian tham taka an intel khawm a nih pheih chuan sawrkarah pawh an 'aw' a lian thei dawn a, chutih rualin sawrkar kut chauh nghak lovin an mahni kea ding thei tura tan la turin a chah a, Tung sawngbawlna khawlte pawh bun belh zel a ngaih dawn avangin hruaituten budget an tuk a nih pawha an pawl intunna tur leh nakina an tan vêka thil tangkai tur a nih avangin pawl tan thahnem ngai zawk turin member kalkhawmte chu a fuih a, sawrkar tanpuina a tawp ruala ðiltiak leh mai 'Pawl' ni lo turin a fuih bawka a ni.

Tun dinhmunah Saitual District huam chhung khaw hrang hrangah Branch 15 an awm mek a, member 735 inziaklut tawhin, Tung hmanga India ram hriat hlawh nih phak chu an tum lian ber a nih thu an sawi.

Tunhnai khan Chief Minister Bana Kaih Innovation Challenge intihsiakah lawmman pahnihna an lo la tawh bawka a ni.

